

70

HARVARD COLLEGE LIBRARY
FROM THE
HARVARD - YENCHING
INSTITUTE
APR 29 1930

~~Ch L 3208,88~~

Ch L 3208 /3142 /83

江南通志卷一百六十一

人物志

孝義 五 寧池太廬四府

寧國府

[唐]蘇仲芳南陵人父死負土成墳廬於其側遶墳行哭羣鳥隨之悲鳴祥雲覆墓瑞草蔓生

萬晏涇人數世同居詔表門復其家

楊慎旌德人光化中試太子校書行義修飭闔門義居累千餘口以孝友世其家

[宋]許遂字伯通宣城人早孤事母盡孝鄉人勵其子輒曰汝獨不慚許伯通乎遂子俞字堯言少失恃父所嗜味

哈佛大學哈佛藥宗圖書館珍藏印

遠邇畢至隨侍都下與其婦茹粗糲而奉饌頗珍公卿多推俸佐之居喪以禮聞

汪文諒字叔達旌德人累世同居凡一千三百口州上其事詔州縣存撫賜以百金諒兄弟感歎曰吾家治農未有一士應上之求者卽以所賜金購書藏之子孫由是貴顯

李經字天常南陵人母死廬墓躬執畚鍤壘垣植松地故多虎後遂絕跡

汪政宣州人累世聚居數百口詔加旌表蠲其課調

呂鏗字夢祥旌德人幼孤事母以孝聞嘗遊宿毫間客潘氏不御酒食問之曰鏗遠遊親養勿給敢自享厚饌

乎政和三年入京上書請嚴生子不舉之禁仕至鳳翔府判官

何自興寧國人寶祐間父元貴疾禱於神刲股以進越三日愈

〔元〕周淳卿寧國人親歿於墓側築永思亭哀慕歷九年不改

〔明〕凌餘慶宣城人洪武初以匠役京師聞母病籲天割股時禁嚴不得輒歸白於官以聞勅以所刲股付餘慶妻兄楊添一持歸妻和糜進其母尋愈詔復役旌其門江休旌德人永樂初父坐事赴刑部臨刑屬諸子以後事休乞請代父曰吾老矣奈何以強壯易我休竟詣所

江南通志 卷五十一
司訟其事得釋父嘉其孝厚予之以貲產休曰此人子
分內事因以爲利可乎辭弗受

侯來保尚書陳廸之僕也廸以靖難抗節與六子同日
死時姻戚莫敢旁視來保潛拾其遺骨還葬宣城

梅應魁宣城諸生父病篤應魁禱於神願捐己算益父
比卒哀毀如禮既葬廬墓蔬食水飲三年始歸

戴三元旌德人父品以黃冊事赴詔獄三元與其兄隨
至京鞠問當刑兄弟爭請代卒以三元代父死

丁恕字子貞南陵人性敦厚好義鄰人垣壞獲束帛內
皆白金簪珥也恕急還之

吳大經宣城人父宗周弘治間以孝旌傳詳儒林宗周

宦臨江繼母金氏從大經在家忽心動犯江濤以行適
及母永訣宗周後病癱大經吮膿嘗糞居喪骨立

陳希良字克忠宣城庠生母疾衣不解帶者經月及殯
廬於墓朝夕哭奠父沒亦如之

俞瓏字汝霖宣城人幼失怙母病篤願天割股得愈居
恒手織草屨雨雪則置衢側聽人自取母終廬墓三年
詔給冠帶旌之

程文冕字志高寧國人成弘時三賑邑饑詔賜七品冠
帶

朱時俊宣城人父夢桂病死數日俊痛不忍蓋棺籲神
求代桂果甦已患癱痿俊割股和丸進之復起

張道榮涇縣人事親篤孝母沒廬墓三年正德中旌表
貢汝悌宣城人父病嘗穢及卒廬墓三年

費有時字子雨宣城諸生孩年母病輒泣不食父漢卿
多疾好客而家貧時多方召客為父歡弟性流蕩有時
以母命終身不析箸

徐棠字友之宣城人性篤孝母病割股籲天果得異人
授藥而愈居喪廬墓未嘗見齒歷任婺源尉氏學博廩
祿悉散之宗親云

陸可宗字省我宣城諸生父病篤割股獲甦有田數畝
悉讓其兄藉脩脯為養

汪昌字大祺宣城人母喪廬墓三年歲祲遺齒通路昌

撤樓板為棺以瘞之正德間以貢授進賢主簿

林桂芳太平人嘉靖間父倬卒於官千里扶輓賊劫其
母桂芳翼之被創死母得免

金俸宣城醫官金璞之僕本姓嚴嘉靖中璞以輸歲額
死金陵子枝甫在襁褓俸破產走京師了公逋歸以所
贏百金營繕田廬與妻聶氏同撫藐孤勞瘁萬狀郡守
聞而旌異之

梅士學字伯典宣城人萬曆舉人肆力羣籍性端醇事
父孝謹奉嫡母得其歡心鄉居不入城市人以為不愧
孝廉

林文榜太平人萬曆間大水父宗倫被溺文榜從樓墜

下援之與父同殞

吳仕期字德望宣城諸生倜儻負氣張居正奪情仕期擬上相國書傳於外南操院胡櫛命太平同知龍宗武捕寘獄訊曰必有指授者舉其人當爾貸蓋指沈修撰懋學也仕期至死無一語連及遂斃於獄後御史孫惟誠具疏聞櫛與宗武俱遣戍

劉芳顯字孔昭宣城人幼孤貧甚挾策遊京師以文見知於大學士劉一燝名重京師從遊者日衆罄所贄歸葬祖父母完諸弟婚并婚從弟以延叔祀宗黨義之

吳日通宣城人與弟日遇同居六十年不忍析箸人稱二難

潘寧海字太乙宣城人六歲時父客外音問久絕寧海圖父像號泣中野後獲父柩於淮邳千里裹骨歸母患膈割股以救

張昭字斯明南陵人年十四父遘危疾割臂煮糜獲愈及卒哀毀骨立喪葬以禮

吳珍南陵人性友愛弟疾篤告天求代不數日弟果愈珍邁疾沒弟撫其七子勝於己出

沈仲騁南陵人弱冠時母沒守棺不入私室比葬父憐而召之不歸以疾卒

劉邦正南陵人年十六父哲病篤割股和藥又夏月思鱗邦正號泣水濱得二鱗以愈疾每朔望禱天願減己

算益父既卒御史宋纁祭其墓

丁慎南陵人兄子涿論死繫獄慎恐兄絕嗣請於官願代涿死獄成知縣胡文靜察其在白而釋之

何正人南陵人七歲時母病浮腫正人以手按之而泣母喪臥尸側諸母泣勸之乃起父卒廬墓三年事聞給冠帶旌之

何璧南陵人力崇正學冠昏一遵家禮太學生遼東邱經嘗寄五百金邱卒璧訪其里人張隅召經弟還之

孫汝棟宣城人嘗有老匠以衣笥寄之閱歲啓笥中有白金二百兩汝棟祕之三年其子稱父遺命來取汝棟悉以付之

杜三陽太平人爲父母及兄割股者四遺產悉讓其兄宗人有逋糧者爲破產償之

左忠涇縣人嘗分產給諸弟有鬻男償負者亡金於塗欲自盡忠解囊救之

孫國訓宣城人母卒廬墓三年虎踞其前畧不爲動黃友璋旌德人於逆旅臥薦下得三十金坐候抵暮有老人行哭而至友璋詢得實舉以還之

嚴大本南陵人割股療母居喪廬墓三年

朱慶福涇縣人嫡母蕭氏病篤慶福傷貧甚惟剜肉不須錢卽割臂作糜進之尋愈

洪希泌涇縣人一歲而孤爲伯所撫伯病劇割股和藥

伯卒廬墓三年

趙桂枝涇縣人年十三遊兵執其父露刃索金桂枝出叢薄間抱父兵以刃揮之號泣不忍釋俱被害

吳惟賢寧國人父沒躬負石以甃墓道廬居三年

汪文英字日賢寧國人五歲失恃哀毀如成人敬事繼母徐氏兄文光沒鞠育二孤子逾於己子

張廷翰旌德人幼失父七歲授小學至文王事王季問師曰此可行於今否師云何爲不可廷翰卽每日雞鳴盥漱衣冠候母聞鼾聲輒欣然去或母微病不食翰亦不食母歿四時薦食如生

江景宗旌德人天啓中以孝旌

呂賜宗旌德人母病刲股療之兄臯宗無嗣撫遺女若己出崇正末歲饑賜宗以己資賑粥三月又嘗途拾百金候其人還之

鮑邦志字君繼旌德人母病劇持刀抉胷取肝食母立愈崇正元年詔賜冠帶郡守爲建孝子祠

胡泰亨太平人兄寧犯法當死無子泰亨請代所司難之乃大呼曰國法固不可移代者甘死於法因涕泣求往疏入上嘉其義割耳減戍

劉茂字時亨宣城人事母孝輕財好施嘗拒窮婦之奔者察其故卽捐貲代償其逋一時聞者誦義焉仕爲閩中都司經歷

方必通太平人年十五割股療父

左鈇涇縣人兄弟同爨季弟早世遺一幼姪會有以人命誣其姪者鈇匿姪挺身任之數被拷掠諸親屬咸謂姪終不得庇鈇曰吾已有子弟止一孤我死以代姪可也會鈇死事大白姪得免

孫世賢太平人父客死燕邸徒跣扶柩歸距家半里無廬可倚晝夜抱棺呼搶族人爲葺數椽虎跑其側不色動廬傍忽涌甘泉旣三載咸勸歸泣曰禮未葬不變服吾何歸乎

梅有振字復子宣城人母病痿痺負而臥起者十餘年兄歿撫遺孤踰己出嘗鬻麻甫定議而賈踴貴或勸增其值有振不應平生贖鬻焚券事不勝紀

曹七善南陵諸生嘗於姑蘇旅邸獲徽商所遺八百金留五日俟其人還之歲饑輸粟五百石佐賑邑人賴焉何炳南陵諸生盜執其父欲殺之炳挺身出救遇害父得脫

孫顯道宣城人兄弟四人已析箸以季負糧繫官各破產贖之家遂落乃復合食歷三世無敢言析者

國朝劉蘭生字君徵南陵廩貢南陵爲征徭所困蘭生酌立條例請於邑令詳憲具疏至今民食其福歲稔施賑全活數千計

趙大復涇縣人善屬文中年家落有大賈負金不索里

中推爲長者家居鍵戶足跡不履市門

夏曰瑚南陵諸生事親至孝親沒結廬墓側順治丁亥洪水爲災曰瑚煮糜舟載沿隄餉之嘗應闈試同寓諸少年惡其方正一日與之步月輒登妓樓曰瑚初不識也少年先予妓金令局戶百計誘之終不可少年始服其操

方士達旌德庠生母喪廬墓父沒刻像事之事繼母克盡子職 順治九年 旌表

陳尚老太平人兄鶴老死於閩中丐資奔喪函其骨歸每止宿淚漬衾枕會嫂焦氏以烈死尚老拮据爲之營葬

饒宗良字直生寧國人少孤事母至孝年二十遊學白鹿洞歎曰吾寧不古若哉從汪有源講學躬行醇恪家酷貧敦宗族建家廟人服其化興起甚多卒無子門人祀之

劉汝鳳字景威宣城諸生與弟堯熙皆以經學名天性孝友弟死衣食其從子爲之婚娶姊寡而瞽迎養之終其身族黨無後及貧不能葬者竭蹶佐之食餼多年而卒

王際康字五清南陵人事父篤孝痛母早沒終身侍父寢食中褻廁踰躬自澣滌登康熙乙丑進士告歸終養吏部以中書擬用堅不赴選父沒任雲南祿豐令道病

卒

葉正萃南陵人三月而孤母周守志以哀勞致痿疾正萃扶侍不離跬步間以事他出雖深夜必歸侍及沒躡踊號慟如醉如癡既葬廬居墓所疾卒

程國聘字應之太平人兄亡撫遺姪甚至終身不與析產素與京口王生善生以忤勢要下獄國聘往省之至其家夜有少婦欵門卽王生妾也具言夫陷縲紲辱身求救國聘呵之去曰吾千里跋涉爲爾夫也如爾失節夫雖生亦覩顏人世矣何忍爲此因秉燭達旦爲傾囊救之王生得免

何士閔南陵人有何滿者盜破其祖母塚以葬親士閔訟之官三年不得直會撫憲檄兩邑令會勘滿健訟事仍未白士閔大慟觸碑而死邑令義之勒滿起棺題曰義士何士閔墓

張裕南陵人明經忠義子生有夙慧祖良浩病亟忠義籲天求代裕始八歲聞之泣曰父不可死兒願死代父以代祖也隨向天密禱未幾果病家人強以藥吐弗咽曰祖病未痊吾何藥爲且吾已告天矣垂死囑人曰勿令吾祖知遂卒知縣康五瑞表其閭學使張廷樞書孺孝型俗以旌之

程鵬字扶九寧國諸生生平力行善事自賑荒周急下至醫藥橋梁施予無算諸孫曾在襁褓者亦知以乳相

江南通志 卷三十一
讓一兒不食則均不食云子書以孝廉爲嘉定教諭亦有聲

胡堯齡涇縣人母喪廬墓夜夢大水侵棺覺而徙葬未幾其原葬處蛟起人以爲堯齡誠孝之所感也 雍正

六年 旌表

胡曾琦寧國人性至孝母沒屏絕葷酒終身父命之遠出忽心動奔歸則父猝患中風得面訣後以廬墓哀毀而卒 雍正八年 旌表

呂立祚旌德人生平樂善不倦瘞遺骨哺棄兒年至九十餘陳鵬年贈之以序稱其敦善行而弗衰入道德而無媿云

汪炳字瑤仙南陵武舉襁褓失怙事孀母王曲得歡心母病劇割股煮粥進之立愈會仇家以農民充役報其幼弟炳往自充母沒弟求析箸田廬惟弟便者聽已而弟亡姪貧甚仍分己田與之康熙戊子歲大祲賑穀數百石不足糴於外江以繼焉同時有姚希夔徐五元者亦以好義稱

劉沆字雲起光祿卿楷子博學善文與兄沛弟燾齊名兄弟後先與於鄉沆未售慕義強仁推廣光祿德意里黨咸被其惠南邑修理儒學沆一身肩之子敬祖雍正丙午舉人

徐強南陵人 雍正十三年以孝 旌表

池州府

唐費冠卿字子軍青陽人登元和二年進士第聞母病革馳歸而母已卒廬墓終喪哭不輟聲御史李行修薦其孝行徵為右拾遺冠卿歎曰得祿養親耳得祿親喪何以祿為遂隱九華再召不起

何澄粹青陽人親病日篤俗尚鬼病者不進藥澄粹剔股肉進親疾為瘳後親沒伏於墓哭踊無數以毀卒當時號青陽孝子為作誄者甚眾

宋許規貴池人嘗在宣州客邸聞旁舍有建康人臥病為延醫治之不愈其人知規長者檢橐得白金托以後事且曰其所餘者悉奉君及卒規為具棺斂以餘金詣建

康訪其家還之後子逃歷官員外郎孫元天章閣待制高允文貴池人為清流主簿會里人張璉忤祭京卒於客邸欲發棺檢視之允文力為保免京召謂曰君高節義當旌賞授定邊軍教授實黜之也仕至汀州守以廉靜為治時稱長者

方綱青陽人其先世自唐咸亨間居九華山東之上田歷四百年至綱為家督合七百餘口同爨而食每日晨起擊鼓集眾雍睦無間言著家法三卷景德二年青陽飢綱出粟五千石以賑轉運使馮亮以事聞詔旌其門甯文達青陽人居陵陽鎮元豐間大水里中漂溺者千餘家文達出粟五千石以賑事聞勅獎里人立祠陵陽

江南通志 卷一百一十一
祀之

余起銅陵人一門聚居至千三百餘人同爨而食起爲家督周洽無間言子孫貴顯不絕

鍾儁字穎叔銅陵人官祕書郎性至孝事親無少違其先自唐時至儁十一世同居合家衆七百餘口朝命獎其義

柯應烈建德人性孝嗜學母閻氏病不解衣侍湯藥癯瘠盡瘁每夕露禱乞減算以益母壽俄聞空中有聲許特延一紀母疾遂痊又十二年而歿時江淮盜起應烈傾家資募義勇鄉里賴以安有欲官之者辭不就

葉蒼貴池人性至孝母於九月病渴思生李蒼走哭園中李樹下忽從葉底得雙李以奉母病卽愈人咸以爲神賜

汪與成銅陵人建炎間池遭寇兵與成一家八十口盡斃後三年與成旣改葬其父余尚不得母骸爲刻木肖像日侍於旁至十年乃得之耐葬父墓

胡仲先字國政貴池人有幹畧閭里倚以爲重提舉趙范奏充民兵統領官端平間邊淮告警有保障鄉井功兩值歲饑傾其私囊量口賑給全活甚衆

元方時發字子春青陽人綱之後一依綱家法爲義門督邑令史午聞於朝旌門蠲役至正二年勅授潮州教授何清甫青陽人大德二年歲饑清甫出粟二千石助賑

事聞詔旌

李鵬飛池州人生母姚氏爲嫡母不容改嫁爲朱氏妻
鵬飛幼不知也年十九哀痛思慕周行三歲得於蘄州
之蘄田縣遂迎歸奉養久之復歸朱氏時渡江省覲旣
卒歲時攜子孫往祭墓終其身以有司上請詔旌其廬
明童彥芳建德人洪武中從宿儒洪仲遵游其家五世同
爨

桂士訓石埭人祖父母及父病士訓皆割股進俱得痊
鄉人作歌頌之

袁惟儒子一貴銅陵縣人宋益宗東流人並割股療父
楊永顯石埭縣人王萬年銅陵縣人王學詩貴池貢生
並割股療母

徐煜字尚德銅陵人素孝友其家千指同炊在鄉里每
創義舉自宣德至成化五值歲饑俱出穀助賑又嘗爲
邑人代輸漕米

徐永元建德人其家六世同居正統二年饑永元出穀
二千石助賑事聞旌爲義民

何永敬建德人七世同居成化間旌
吳永康青陽人幼失怙晝夜哀慕同里柯暹榜其堂曰
慕親後以輸粟賑荒成化二年被旌

夏鎮石埭人成化間父早亡鎮爲傭養母母病目將瞽
每日以舌舐之復明母歿殯於野結茅其側三年哭不

江南通志 卷五十一
輟聲一日野燒及其廬鎮伏棺痛哭俄風返火熄柩獲
全

吳徹字靜卿貴池人弘治中歲貢事繼母薛氏盡孝兄弟五人友愛甚篤又同邑檀世仁本諸生以母病棄所業文史徧購方書遂工診治親調藥以進愈迨後母歿居喪極哀侍父跬步不忍離

李希仁青陽人事母孝母歿廬墓正德十三年被旌又石埭唐輝亦以廬墓稱孝

程璋青陽人母早寡遺腹生璋及長痛母節未彰正德中徒步詣京師刺血草疏擊登聞鼓以進特旨旌表

沈唐恭石埭人事繼母最孝謹兄武恭以誣繫獄論死唐恭痛武恭尚未生子詣獄代繫以出其兄適大盜劫獄囚俱逸出唐恭獨留郡守義而釋之

紀孟綱貴池人有至性事親篤孝勤於奉養澹於榮利鄉里翕然稱之

宋邦輔字子相東流人嘉靖丙辰進士官御史因諫大禮削籍歸躬耕養母妻操井曰子任樵牧高風動遠邇陳桂字汝芳貴池人嘉靖中由貢授彝吾令以廉靜爲治父年九十五歿桂已七十餘哀毀不輟時稱至孝子光祚素好義族有以繼嗣競者光祚曰何至以財利傷天倫乎乃推己產爲定其嗣

袁國光字賓求青陽人素敦厚嘗於新安旅次拾遺金

江南通志 卷五十一
俟其人還之又娶妾知爲故家女卽召其父挈女歸不責身值

章忠銅陵人幼孤性敦孝友母病割股母歿廬墓終身疏食兄嫂客死京師徒步往扶其櫬返

胡大武貴池人嘉靖初貢入太學聞母病馳歸曲盡孝養母瞽八載一日復明人以爲孝感

葉叢椿字汝靈貴池人家素貧祖母年九十餘父母年亦六十兄嫂皆早逝遺孤一人叢椿盡力孝養并撫孤姪成立祖母暨父母相繼歿拮据斂葬畢其姪又亡叢椿復撫其孤嫠始終不言瘁時人賢之

廖廷皓貴池人力耕養母一日廷皓在田母被虎厄急追力救始得脫負母返室見母傷處腫甚爲口吮其毒數日腫始消

孫懋述字清華青陽人性至孝居喪哀毀廬墓九年感馴雀之異郡邑屢舉孝子萬曆中以貢歷忠州學正署州事值懋酋之亂有城守功

江鯤字南溟青陽人事孀母盡孝侍疾衣不解帶居喪不御酒肉置義田建家塾歲饑出穀周鄰里

吳應彥貴池人柯達字本章俱貴池人並割股愈父母疾達居喪哀毀廬墓三年萬曆中旌表

柯延茹建德人事親盡孝兄薰致仕歸延茹食必共席疾必侍藥時百口共爨延茹總理家務以雍睦稱

王之璘青陽人布政使一楨子天啓丁卯北闈副榜考授通判明季徵辟賢良大吏交薦之璘以養母堅辭不赴設義田贍族建義塾訓士歲饑糴穀助賑鄉人德之楚兵南下之璘罄家財募壯勇嬰城固守邑賴以全郎大徵貴池人楚師薄城馳說其帥卽獲歛兵退安撫錄功題授遊擊辭不受

陳其恭銅陵人邑東北仁豐三圩向無埂岸江水內灌悉爲巨浸崇正十一年其恭及弟其葵捐資買繁昌縣民地爲堤址創築堤四百餘丈三年始訖工自是圩無水患居民祀田祖必分胙餽之

柯孟顯字惟達貴池人幼孤事母以孝聞崇正庚辰輸穀賑饑邑人頌之

汪景德建德人割股療父疾又母病嘗舐之復明親歿廬墓

國朝陳光正石埭縣人少孤嘗自痛不逮養其父事母加謹母歿旣耐葬父墓卽廬其側哀號不出有醴泉湧石罅見者以爲孝感又建德吳來芳事母盡孝

楊國儁石埭人父歿廬墓

方祥美貴池人性孝友有幼弟爲母所鍾愛喜依之居每膳祥美輒負其母來食已仍負之返積十數載以爲常後其弟坐盜誣繫獄祥美盡鬻己產以雪之

郎思誠字孺若貴池人幼孤事母孝嘗割股療母疾後

母歿啜粥廬墓其地素多虎自廬墓後虎遂絕跡值歲
饑疫減價糶穀又施粥給藥多所全濟順治十三年徵
選遺良郡守顏敏欲舉思誠純孝堅以老疾辭 雍正

五年 旌表

王之光建德人幼為石工孝事其母從工所得肉必攜
歸奉母母卒廬墓三年或其日就工數十里外及夜必
趨墓所

吳日光青陽人性敦孝友好義樂施鄉里欽其名德平
日設立規條訓戒族人皆以馴謹聞

陳萬昇貴池人與弟嘉蔭從弟萬鵬同就外傳康熙己
酉盜掠近村嘉蔭萬鵬被執萬昇請代弟死盜并殺之

陳國甲字元及貴池諸生父年老抱沉疴五載侍湯藥
不倦弟早世遺孤僅八月撫愛踰己子性樂善好施予
康熙戊子己丑間遇饑疫賑粟施藥存活無算居常賙
贈有喪飲助貧不能婚嫁者寒施絮暑施茶橋梁道路
修葺以便行人年七十二無病而終子鵬與爵皆能繼
其志

太平府

漢方儲字聖明丹陽人除郎中丁母憂歸負土成墳種松
千株鸞鳥栖其上白兔游其下

唐朱憺繁昌人割股愈親奉詔旌門

王丕繁昌人數世同居里閭高其義睦聞於朝廷旌門

賜粟帛州縣時存問仍復賦稅

宋趙權當塗人母病篤權焚香夜禱泣日母死權何以生取刃刺脅取肝以進母漸瘳權亦遇良藥無患太守孫楙表其里曰孝感坊

張崇繁昌人登進士第仕至太常丞自祖瑁以來千口同居雍睦無間言嘉祐中楊傑過其家書義居二字遺之

聶雲蕪湖人割股愈父其後伯父病復割臂以進而愈咸淳十年知州孟之縉獎其孝

元張鏊字文煥東平人至元中任太平路總管府治中秩滿因家當塗事母純孝母沒廬墓有紅蓮變白之異郡

為立孝感蓮坊大德二年旌表

芮世通蕪湖人十世同居奉詔旌表

夏餘達當塗人自宋慶曆中七世祖邦政以來合族同居至正末年旌表家有田一坵每歲麥秀皆雙穗知府

李習尚書汪澤民並為傳

邢國傑當塗人嘗以布衣條議時政大臣為改容謝至正中檄授繁昌校官以親老固辭

胡光遠當塗人事母盡孝母喪廬墓一日夢母欲食魚晨起將求魚以祭見生魚五尾列於前俱有齧痕隣里

驚異忽見有獺出草中浮水去衆知乃獺所獻事聞旌表

江南通志 卷三十一
明魏祥蕪湖人性至孝領成化丁酉鄉薦以母老不忍遠
離絕意公車朝夕侍養母沒祥哀毀卒

楊乙六當塗人自乙六至貴二五世同居自貴二子旺
七一支更同居四世食指千計條置家法鉅細有禮萬
曆十年旌表

王華繁昌人十三世同居

夏廷美字雲峯繁昌田夫篤於孝友里人敬信從張緒
焦竑講學多警悟沒祀金陵理學祠

韋學仁字春麓蕪湖庠生經明行修鄉里稱其孝友子
受薦賑荒卹族亦有行誼

李仲名當塗人太學生幼孤事母孝母沒廬墓二年後

遇烈風雷雨必省視墓側嗚咽移時天啓元年旌表

丁大相當塗縣人張秀蕪湖縣人徐大賓與汪琦俱繁
昌縣人四人皆廬墓以孝聞

徐思明當塗人父母病兩次割股母亡廬墓天啓年旌
李潔蕪湖人父病割股及沒廬墓

魯熹曾瀛孫璠三人俱當塗人黃文星楊逢時陳景三
人俱蕪湖人魯煥與閔濟周俱繁昌人並割股療親

趙應時蕪湖人扶父櫬遠歸遭風舟覆抱櫬呼號漂數
十里遇救獲免人詫其有神助

章杞字弘奎當塗人與韓良直爲密友韓疾劇以三十
金授杞囑之曰妻方有孕若男也可以此撫之韓亡後

江南通志 卷五十一
妻果生子杞給衣食得成立及杞抱病垂沒呼韓氏子
至啓篋金三百授之曰昔汝父臨終以三十金見托自
營息歷年來今已十倍可謹守之子歸白母母感泣聞
者皆高其義

丁僧當塗人鬻水麓心寺拾金欲還恐出入無時與失
金者左遂削髮寺中久俟其至旣還之後堅却謝金

國朝楊璜字希周當塗縣人會兵繞其鄉璜匿妻子林中身
守祖墓兵將執之遂赴水死子甫十齡見父溺號哭亦
奔投於水久之父子兩屍攜手浮出見者嗟異

孫啓綸字君受當塗人究心理學事母以純孝聞嘗負
母避盜盜識之曰此孫孝子也遂解去

陳三齊繁昌人農家子十二歲母死朝夕上食哭泣盡
哀旣葬獨廬墓側三年始歸

楊一儒字翼真當塗庠生事母孝頻奉母命賙親族之
困子錫汝令孝豐邑多逋賦前令坐累者數人一儒毀
產代償咸頌其義

宋真儒蕪湖人與弟繩武俱少孤事母盡孝母沒兄弟
廬墓悲號不輟池蓮變白色并有雙莖之異又四世同
居置田贍族 康熙五十三年 旌表

廬州府

漢毛義字少節廬江人家貧以孝行稱南陽張奉慕其名
往候之坐定府檄適至以義守安陽令義捧檄而入喜

江南通志 卷一百一十一
三
動顏色奉心賤之及義母卒去官數辟公府舉賢良徵
皆不至奉歎曰賢者固不可測往日之喜乃爲親屈也
建初中章帝下詔褒美賜穀千斛常以八月遣長吏問
起居壽終於家

南北朝齊王虛之字文靜廬江人居父母喪以孝聞武帝
永明中詔旌門蠲租三世

唐萬敬儒合肥人三世同居親亡廬墓大中間旌表其門
名其鄉爲成孝

唐海巢縣人母喪廬墓手自耕植以備祠祭忽於田中
產嘉禾一本六穗一本五穗廬州刺史裴靖上其事作
嘉禾表以聞

張進昭巢縣人事親孝母患狐刺墮左手死進昭截左
腕廬於墓

徐行周舒城人數世同居詔旌其門

袁傑無爲人唐末盜亂傑招集義兵保障鄉里拒敵不
勝死屍僵七日不仆賊棄諸河逆流而上將至黃金城
母尋見之曰若是我兒呼之必動呼果動鄉人神之因
立廟名其處曰呼兒港

宋王光濟廬州人母亡刻像事之如平生孝道純篤咸平
中詔旌之

呂士元巢縣人哲宗時立十科法士元上疏懇切未報
後累試不第歸而憤曰當今蔡確蔡卞呂惠卿章惇四

害未除吾等困老田間與世無補乃去東山二里許抱書投橋下朝士王巖叟朱光廷咸惜之因名其橋曰抱書

趙廣合肥人淳化中八世同居

何宗壽梁縣人李吳貞合肥縣人皆割股療母病

方孝子無爲人名未詳母目雙盲每旦餽之久之眼復

明

余元璨汪安淵檀念二三人俱舒城人皆割股療母病事聞於朝詔付史館令有司依例優給

元羊仁廬江人至元初阿朮兵南下仁父被殺母及兄弟皆散去仁年七歲賣爲汴人李子安家奴力作二十餘

年子安憐之令爲良仁踪跡母於潁州蒙古軍塔海家兄於睢州蒙古軍岳納家弟於邯鄲連大家爲役俱無恙乃遍懇親故貸得鈔百錠歷詣諸家求贖經營六年大小二十餘口復得完聚鄉里稱美大德中旌表季原禮無爲人性最孝親終廬墓不食鹽醬子立與曾孫廷春居父母喪並如之立母目瞽餽之復明人謂一門純孝

明吳敬無爲人母疾割肝煎湯母愈而敬不傷事聞太祖官以贊禮郎

廖鏞巢縣人永忠孫歷官至都督建文時豫議兵事鏞與弟銘及同縣指揮倪遴皆嘗從學方孝孺孝孺死鏞

銘收葬遺骸遴慟哭奠祭俱被收論死

向侃字希顏中永樂甲午鄉試宣德間判靜寧州職專撫民未幾裁天下撫民官缺巡撫獨奏留之擢御史出知澂江府侃天性孝友兄弟五人白首同居妻亡鰥居四十年

高興合肥人事親盡孝父歿廬墓三年烏巢墳樹興哭悲鳴以助其哀服滿親鄰勸歸有白鵲數百大如鶴鶴隨後翔集其宅良久方去是時同邑張俊亦以孝聞並旌

錢敏舒城人永樂辛丑登第乞終養母歿廬墓詔旌之薛崇禮弱冠食餼泮宮讓選貢於師楊澤民逾年應歲薦復以讓老友周承軒邑令延主西塾訓課外毫不干以私居家孝友與兄崇仁俱爲時重沈謹合肥人母喪哀毀廬墓築壻而泉湧出哭奠則鵲哀鳴成化間旌

朱世藩合肥人幼孤奉母盡孝母故藩嚙棺呼號口眼血出遂喪明奉旨旌

衛郡合肥人母病篤思飲泉水是年旱郡叩天掘井泉水湧出母飲之而愈鄉人稱爲衛孝泉奉旨旌

鄭元合肥人五世同居弘治時旌

沈秉直十二歲割股療母疾奉旨旌

張梅合肥人母疾篤嘗糞嘗痰復病疽吮出膿血得愈

父歿廬墓奉旨旌

李得春合肥人年甫十三父病嘗糞到股母病亦如之父母歿俱廬墓三年冬月有野草生花之異

王紹字繼學舒城人由進士任監察御史母喪躃踊頓絕廬墓三年詔旌之同邑胡紀官吏部主事亦同時以孝旌

孫剪兒舒城人早喪父事母孝樵採供甘旨母卒露宿墓側鄰翁憐之爲結廬鵲巢樹上哭則悲鳴相應復有兩虎每日晡至墓側旋繞哮吼達旦而去刻木肖母像事之終身

張政廬江人父病侍湯藥及卒哀毀踰禮廬於墓側虎不爲患人以爲孝感正統年旌

陳本忠無爲人正統庚辰輸米九千二百斛子志高二千斛志達穀八千八十斛以備賑又憫流民路宿卽舍傍披草萊爲屋百楹居之復施粥二月以食飢者父子三人俱奉勅旌

朱燦無爲人厚重好義正統間歲歉燦以米四千四百斛輸官同族名亮者設粥日食數百人朝廷旌曰尚義之門

張澄廬江人少時執厨役事母惟謹母喜飲澄必具佳醢少不樂輒唱舞以怡之兩拾遺金俱驗實還之嘉靖年詔賜壽官

江南通志 卷之二
朱宸萬曆間諸生與妻李氏侍母病衣不解帶者三月
妻素羸遂成痼疾與姑相繼卒時宸年未四十誓不再
娶縣令爲詳府云廬陽有節婦無義夫幾爲缺典宜表
揚以勵人心准給冠帶

李大經周繼成詹天瑞俱廬江人刲股廬墓

丁華一無爲人兄弟五人不忍析居相與誓天折梅五
枝共接一本各識之祝曰如一枝枯卽某有異心後五
枝俱秀實鄉里驚歎號五果丁氏

吳孝子無爲人逸其名家貧常執役富室身無完衣母
饒甘旨富人有感其孝者常資給之後母歿未葬鄰家
失火將及其廬力不能救惟伏棺以號火燄他徙左右

無一免者惟孝子廬獨存

章華國無爲人少孤授徒養母母病篤國刺臂血飲之
而愈後母病異瘡國禱神齋宿夢神人指京紅紙熏之
果愈母歿三年不茹葷酒每臨肉食則涕下竟以羸疾
死

楊舜漁號見呂無爲人敦本尚質里中目爲楊古人教
子姪義命自安一門之內自相師友京山李本寧述其
行子維嶽鬻產助餉聞流寇之難絕粒以歿

杜濂無爲人少客維揚又客蕪湖嘗兩拾遺金數百金
俱遲其人至悉還之後濂晝寢夢神語曰汝來日合雷
震死爲有陰德宥之矣次日雷擊其家牛驢各一濂無

志

姜潤巢縣人母病割股

張四哲合肥人崇正乙亥流寇圍廬急四哲率弟四美四奇與賊戰城下不勝退謂兩弟曰城將陷與舉家戮辱死不如清白死遂偕弟暨妻女子婦共一十五口投井以歿

余承德無爲人崇正十五年流賊突至承德掖其祖母劉母魏及妻楊妹玉女出避祖母母爲賊所獲承德號救並遇害楊投水死

國朝張維德合肥縣人崇正乙亥流寇入境其父被執將見殺維德甫十齡延頸就刃乞代賊感而釋之順治丙申

父歿德哀毀骨立既葬廬墓三年

方華合肥人父妾生一子先經析產父歿後復以祖遺讓之少結婚魯氏其女瞽父母欲不娶華曰兒不娶女將誰適娶後相得甚歡

張大履合肥諸生父母歿事兄益謹壬午兄臥病邨居偶思肉食大履走數十里求肉不得及回兄已殞遂終身不食肉妻早亡念其荼苦單棲四十餘年

李珙合肥人武舉家素饒崇正十三年奇荒珙捐貲糴穀以賑順治九年斗米四錢珙置飢民簿計口授糧月三次輪給之近者舖以糜里人稱貸券可盈尺一日盡焚之康熙十年旱蝗富家出穀市利十倍李獨不取償

有司榜其名爲衆勸

魏振趾合肥生員出穀賑饑親歿廬墓

胡蔭合肥人親疾割股

楊光耀無爲人攻石爲業母病夫婦相繼割股進之各不自言久之見癡痕相持而泣

張振祚廬江人父弘任攜孥知四川嘉定州崇正壬午流賊逼城祚奉父命領數騎突出求救城陷祚還見父被害觸石死時弟振祺應試回籍阻絕無音耗迨順治甲午聞信奔赴至保寧不得前巡撫李國英拔署梓潼縣閱三載道始通卽辭官尋母遇之峩眉縣年七十餘矣奉以歸

宋儒醇字衍魯廬江諸生有行義明末流賊劫殺西鄉中忽有一人大呼曰此予恩人宋公里也衆問故其人泣曰余蕪湖人十歲父賣我償債遇宋公助銀二十兩全予父子必保全此鄉以報德順治九年歲饑儒醇出穀千斛助賑

許祝年字樸齋廬江廩貢選沭陽教諭以親老不赴後考授主事邑遭水旱首捐穀數百石倡賑濟著澹寧集張文達字必之合肥人明季壬午夏詣北莊收麥聞寇至奔還於積屍中覓得其父尚未死負行七十里抵莊得全達年至百有三歲奉

旨建昇平人瑞之坊

王鳳吾合肥農夫也事孀母食必親進夏日先坐母於涼處而後往田天寒令妻抱母足而眠歲以為常

高克謹字式毅廬江人年十三父為寇獲謹乞身代寇兩釋之長而好義鬻產賑饑置田贍族還人遺金代償鬻妻者債同邑有李之幹字縮公其行義畧同

賈又彪字偉三舒城貢生孝友性成撫教孤姪四人不異己子有蕩產者更以己產給之相葬地山中遇虎不啗人以為孝感 雍正九年 旌表

朱維世字斐英舒城人敦本好施助親族之不能婚嫁者賑歲暮之不能舉火者一切施棺掩骼之事靡有不為 雍正九年 旌表

郭士瑛字右璋舒城人康熙乙卯舉人五歲喪父哭泣如成人母歿冒雪躬自築墳友愛前母兄及庶弟人無間言

許明時字吉生舒城人歲貢授建平訓導少孤事母孝母歿廬外不茹葷酒者四年嫁族人女代兄償負宋志靈廬江人字子睿事後母極孝以拔貢授訓導辭不赴母病繞膝呼號願以身代母歿廬墓三年有白鳥來集之瑞

張一綸字莘野無為人三齡失怙奉母極孝九歲母病危篤籲天請代遂獲延壽孺慕終身不懈友愛兄弟推財讓產雍雍如也二子熹烈俱以孝友聞父母未葬冬

不衣絮樂善好施族戚待以舉火者甚眾嫁娶喪葬皆
傾貲助之里有義門之目

江南通志卷一百六十一終

江南通志卷一百六十二

人物志

孝義 六 鳳穎二府滁和廣六泗五州

鳳陽府

漢桓鸞字始春龍亢人焉弟子也少立操行緼袍糟食不
求盈餘時太守向苗有名迹乃舉鸞孝廉遷為膠東令
始到官而苗卒鸞去職奔喪終三年然後歸淮汝之間
高其義後為已吾汲二縣令甚有名迹子暉

趙孝字長平沛國蘄人父普王莽時為田禾將軍任孝
為郎及天下亂人相食弟禮為餓賊所得孝聞之即自
縛詣賊曰禮久餓羸瘦不如孝肥賊大驚並放之謂曰

可且歸持米糲來孝求不能得復往報賊願就烹衆異之遂不害鄉黨服其義顯宗聞其行詔拜諫議大夫遷長樂衛尉復徵弟禮爲御史中丞

趙禮行已恭謙類於孝帝嘉其兄弟篤行欲寵異之詔禮十日一就衛尉府大官送供具令共相對盡歡數年禮卒帝令孝從官屬送喪歸葬孝無子拜禮兩子爲郎范遷字子廬相人有清行仕爲漁陽太守後居公輔有宅數畝田不過一頃復推以與兄子其妻曰君有數子而無立錐之地盍餘俸祿以爲後世業遷曰吾備位大臣而畜財求利何以示後世也

唐董邵南壽州安豐人苦學讀書隱居行義事親備極色

養其孝慈及物有雞犬相哺之異韓愈作董生行頌之李興安豐人父死哀毀口鼻流血猶捧土就墳廬於墓側廬上產紫白芝二本醴泉湧出柳宗元作孝門銘

宋步游張張姓少失母徒步尋訪因稱步游張久不得忽至宿州見病嫗究問乃其母也相持大哭遂就養因家於宿

元許崇政下蔡人廬墓以孝旌

孫克忠宿州人以孝聞

王珍宿州人累世同居

馬希先懷遠人舉鄉貢授陳畱教諭養親不就職竭誠奉事廬祖母墓及父母墓凡九年

姜起宗懷遠人五世同居

高中懷遠人祖仕宋爲安撫使父文龍先卒事祖盡孝養事叔文豹如事父服闋以嫡孫當襲請讓文豹至元間事聞詔旌其門

〔明〕郭子興定遠人元末起兵自稱元帥一見太祖奇之授以兵妻以所撫馬公女卽馬后也後封子興滁陽王妻張爲夫人立廟滁州

劉繼祖字大秀鳳陽人仕元爲總管家饒於財與明太祖父淳皇帝爲比鄰後崩太祖年十七家貧無葬地繼祖以地給之旣貴官其子英追封繼祖爲義惠侯妻婁氏夫人

張倫鳳陽人河南衛百戶洪武四年以親老乞解職歸養上嘉之命爲濠州衛副千戶

王阿孫懷遠人父疾刲股以進立愈母病又割肝以進亦愈洪武年旌

羅子明鳳陽人父病刲股歿後廬墓三年

沈律陳汝聯連思恭三人俱鳳陽人刲股療親

王綱定遠人事母孝母歿茹蔬廬墓宣德年旌

張簡懷遠人正統五年輸麥一千三百石賑濟景泰四年復輸粟三百五十石奉勅旌表賜冠帶

廖冠平懷遠人正統五年輸小麥一千一百石弟冠正冠玉各輸粟五百石助賑俱奉勅旌表

江南通志 卷五十三
李忠鳳陽人事親孝親歿廬墓斷葷酒每慟羣鵲悲鳴
若爲助哀景泰時旌

李寬宿州人母歿負土成墳結廬墓側常見二兔馴擾
其旁暇則合藥濟世景泰年旌

郭興宿州人父喪廬墓側手植樹千株灌培鬱蔥有馴
兔之異景泰年旌

黃金字良貴定遠人成化甲辰進士歷官廣西參政歸
里值歲饑民疫指畫賑濟自爲煮粥活數千人所著有

東澗集泉山稿

許本忠懷遠人事父母孝母愛少子因愛其弟益篤父
母亡先後廬墓六年弘治中旌子璉事本忠孝亦如之

劉澄懷遠人孝行弘治年旌

張全臨淮人幼喪父事母至孝母年八十一卒旣葬猶
泣血哀毀鄉士大夫舉孝行哭辭不敢當叔祖伯叔祖
母貧無嗣請同居生養死葬焉弘治年旌

王澄臨淮人三歲喪父事母純孝母死結廬墓側衰絰
不去身塚前產芝弘治年旌

張欽鳳陽人孝行弘治年旌

王裕宿州人父喪哀毀廬墓兩產靈芝弘治中旌

胡淳壽州人正德間出穀賑饑還遺金嘗買婢其父因
失馬價銀賣女以償淳如數與之歸其女人重其義

張潼靈璧人正德中流寇入邑祖被害潼號慟大罵願

與俱死賊憐其孝不忍殺之後奉母備極色養
連楫鳳陽人事父先意承順稱純孝事聞旌之

蒯昂字廷舉壽州諸生母喪廬墓

劉鳳字鳴岐壽州人母喪廬墓

馬體乾臨淮人父喪廬墓

金爲聲臨淮人刲股療父

顧琛壽州人母失明琛竭誠禱求目遂復故

曹格靈璧人性孝謹有蘇商陸某僑於格舍病故囊蓄
五百金格爲之殯促其子至與之

趙銘宿州人刲股愈父

詹臺錦臨淮人割股療繼母病

韋儒懷遠人母病衣不解帶親嘗湯藥顙天願以身代
母死儒過慟嘔血亦死嘉靖十年旌

陸欽懷遠人母歿廬墓

張賢懷遠鄉民父母歿先後廬墓凡九年

郭藩定遠人嘉靖中父壽卒於京藩徒步數千里扶觀
歸葬結廬墓旁日夜環冢哭有剽掠者過其廬戒曰此
孝子也勿驚墓常出金色蛇人以爲孝感

耿約懷遠人事繼母孝父歿廬墓弟蘭早亡撫其孤與
己子同周貧乏人咸德之

許士俊懷遠人年十七隨父渡淮父墮水士俊號慟入
水中求之三日抱父屍出萬曆間旌

袁鏗懷遠人奉孀母孝司訓張天祐卒於任貧甚鏗爲殮之賻其櫬歸歲饑嘗輸粟以賑

徐彥良懷遠人與弟彥聰捐粟賑饑掩骹埋骼施棺槨無虛日

潘儀定遠人母卒廬墓

蔡斌徐榮俱定遠縣人割股愈親

劉時暢虹縣人母病劇暢取母糞嘗之味苦曰我母生矣果愈

鄧讓字汝謙壽州人父卒有異母兄疑讓少子有厚蓄讓卽盡出囊橐畀之母卒哀毀過禮歲饑出米賑給全活甚多

陳自修鳳陽人母亡殯於中庭崇正八年獻賊犯鳳自修繞柩哀鳴竟被害

國朝馬魁臨淮縣人母死自具畚插負土壘墳三年廬於墓側

王繼善臨淮人割股療繼母病

邵光先懷遠人順治六年獲遺金三百餘兩其人尋至欸以酒食還之其孫蘭蕙二人年尚幼亦還醉客銀白二十兩

張明棐宿州人順治中賊五十騎入其鄉家人俱登樓母劉年七旬不及避爲賊所劫明棐急下救母賊執之支解而死母遂得免十七年旌表

孫守信宿州人好施予待以舉火者數十家有戚託孤授金三百守信俟其成立還之封緘如故兩舉鄉飲賓王永康宿州諸生葬母廬墓側三年

曹培靈璧諸生執親喪躬自壘土爲臺寢處其中朝夕每聞其泣聲未及歸而卒人稱孝子臺

尹國泰靈璧人年四十餘無子妻爲置妾詢其自知爲名家子從夫宦遊爲寇掠至此國泰惻然卽日遣置別室訪其原配贈貲還之

陳懷禮靈璧人有饑民王姓者指妻爲妹賣懷禮作妾問得狀卽日還之不問原資

周建古懷遠人父希賜卒於官建古匍匐數千里扶觀

歸事繼母嚴氏盡孝旣葬二十餘年未離墓側

徐遇字天衢壽州人事節母李氏極孝弟析居後產中落仍與同居不分爾我樂施不倦鄉里稱爲仁孝先生徐自鑑壽州人父早卒母馮氏爲姑遣嫁南昌自鑑旣長徒步尋得之迎養焉

戚雲鵠壽州人以木工爲業有徽人謝君英避火以箱授之火息密訪其人還之箱內白金如故

黃應麒壽州人性孝友母病失明曲盡奉養母歿哀毀骨立產讓二弟遇自經者以藥救起之知爲鬻子失金者應麒贈金如數遣歸

邢對字溥公壽州人事母孝奉養備至嘗還人遺金子

雨甘亦以孝稱同邑馬化亦以還金稱鄉里

陳姓失其名居壽州貧爲傭竭力奉養父母死葬門外日哭於墓久而無間

潁州府

後漢韓伯俞城父縣

有過母笞之泣母曰他日笞汝未嘗泣今泣何也曰他日笞常痛今母之力不能使痛是以泣也郡人稱其孝立祠祀之在義門集西

唐朱仁軌字德容亳州永城人隱居養親嘗誨子弟曰終

身遜路不枉百步終身遜畔不失一段有赤烏白鵲棲所居樹詔表其異及卒郭山暉員半千魏知古共諡爲孝友先生

朱敬則字少連亳州永城人仁軌弟以孝義世被旌顯

一門六闕相望敬則志尚恢博好學重節義高宗聞其名召見異之除右補闕武后時開告密羅織之路與大獄張易之因構魏元忠張說欲誅之無敢言者敬則獨奏曰元忠說皆秉心忠一而所坐無名殺之失天下望乃得不死爲冉祖雍誣奏貶涪州刺史旣明其非罪改廬州代還無淮南一物所乘止一馬子曹步從以遠睿宗朝劉幽求奏曰敬則忠敬義烈天下所推追贈秘書監諡曰元

五代常彥能潁州人朱溫攻淮南過潁潁人畏避溫怒曰軍回當屠城至淮久雨乏糧彥能自以家貲餉軍溫喜

江南通志 卷之三
賞以官不受溫曰汝何欲曰穎人畏王威逃遁不敢迎
幸察之貸一城生命溫從之穎人得免於難

麴溫潁州汝陰人居家孝友乾祐三年旌表門閭

張仁愿譙郡人存敬子有孝行存敬歿事其兄仁穎出
必告反必面如事父之禮曉法令事梁唐晉常爲大理
卿卒贈秘書監

宋張可象潁州人七世同居宋延平中詔加旌表仍蠲其
課調

元張紹祖字子讓潁州人讀書力學以孝行聞授河南路
學教授至正中奉父避兵山間賊至將殺其父紹祖泣
曰吾父耆德善人請殺我以代父且若輩獨非父母所

生乎何忍害人父賊怒以戈擊之戈應手挫鈍因感而
相謂曰此真孝子不可害乃釋之

張旺舅霍邱人幼失父母陳氏居貧守志旺舅九歲賣
錫以養其母母病貧不能求醫惟日夜痛哭顙天求代
未幾遂愈又自以生業微不能多給竟不娶以終母年
有司言於朝旌之

劉通亳州人家貧業農母夫明通斷酒肉日夜禱於神
歷三十年不懈母年八十五日復明

明徐汝楫霍邱人父歿負土培墳廬於墓成化六年旌

李崇德字養淳潁州衛人生平孝友仁愛賑貧乏修橋
梁凡益人者孜孜不倦隣人以地售曰吾世隣忍售爾

地乎助之以粟而去子文煌文輝俱登賢書有弟早世
教其孤三人皆爲博士弟子員

李琦之字公韓潁州人年二十流賊陷潁執其父文哀
索金無以應欲殺之琦之求代父死詞甚哀賊不聽因
罵賊賊怒立斃刃下賊衆中有憐而相勸者終釋其父
琦之妻年十六亦自縊以殉

杜煥字永顯潁上人母病危割右股肉和藥療之遂愈
父晚年兩目失明又割左股肉爲羹以進父目漸開人
以爲孝感所致由監生例得選乞歸養親服闋授福建
按察檢校琉球入貢憲長委煥賓接使者以金爲贄煥
正色曰遠人慕化而來吾奉命賓接而先受金可乎使

者敬服官至延平通判

王翊潁上人弘治間以孝行旌

張价字大之蒙城人母病目盲价舐之而愈弘治四年
舉鄉薦後訓鄆城有教澤母亡廬墓三年

楊昇武平衛人葬父結廬墓側蔬食三年黃河水屢溢
至廬輒回弘治間詔旌其門

時尙祥潁州人祖父病目每晨祝天餽之目復明又割
股以療祖疾

杜憲周之士俱潁上人皆割股療父病

魏安民王敷政俱潁上人皆廬墓

成綱武平衛人母亡結廬墓側冬不衣絮夏不揮扇墓

江南通志 卷一百三
木生連理枝詔旌其門

林鵬太和人正德辛未流賊之變鵬負母而逃遇賊將殺之感其孝不忍加害母年八十有三鵬未嘗一日離左右及歿送終之具不分委於弟兄

張一鳳霍邱人嘉靖壬午舉人母孀居孝養惟謹嘗有盜入室鳳不顧妻子獨負母而逃得免於難

甯中立字爾強潁州人萬曆癸未進士選庶吉士尋改禮部主事晉郎中疏請養母閱十八年孝敬備至母終補原官擢尙寶丞卒於官中立讓產於兄好周人之急而自甘粗糲鄉里稱之

李文明亳州人以鄉貢授武英殿中書萬曆四十三年
毫大饑文明捐米一千五百石以助賑勅賜蒼生寄命四字以旌之

吳自勵字健甫天啓間選貢例得任別駕以養親不就父歿撫育幼弟俾之成立凡田舍之美者悉讓之友人劉某以千金密托之曰吾子未至蕩盡家園此金斷不可與已而其家果日落有饑寒之憂乃召其子戒其妄費以金還之

白精衷字輔乾潁州人五歲而孤母袁氏甘貧守節每自齧糠粃以飯餉兒精衷泣曰兒無能供饘炊乃忍食細而母食粗乎每食卽先啖粗糲以示甘天啓丁卯舉於鄉崇正乙亥流賊破潁州家人勸逃匿曰母守我四

十年我何忍舍之去賊刃之至死猶手護一袴曰吾母手裁也

張燦垣霍邱人賊屠城父被執冒刃入賊營救父不克伏屍痛哭瞋目大罵奪賊刀相併賊怒殺之

汪時譽霍邱人九歲喪父事母孝謹三遇母病刲股者三皆獲愈

萬鍾徐興祖姚得山李嶼李岷五人俱霍邱人輸粟千石賑饑奉旨旌表

陳鏞李義王崇禮胡義朱理王暘胡敬七人俱霍邱人皆嘗輸粟五百石以賑饑民事聞奉詔旌表立碑紀其事

檀之槐字量垣潁州人事親孝教授里中以束晡佐甘旨崇正八年城陷時母柩在殯不忍去賊掠其家槐持石杵連斃二賊又傷數賊後賊來益衆被創而仆縛屋柱間磔之移時兩目猶閃閃動也

張芳亳州人母亡廬於墓側次年秋病篤妻子往視之不令入廬而卒

汪泉字及之蒙城人父歿廬墓有白鳩巢其廬

張忠卿蒙城人親歿廬墓三年

陸九一蒙城人三歲父亡母年二十六甘貧守志歿後九一廬墓三年不茹葷血

張顯思蒙城人年十三喪父廬塚上日夜號泣有盜經

其廬曰無驚孝子相率而去遺產盡推予其兄授徒自給

韓文昇蒙城人母劉氏苦節撫昇母病篤昇與妻柳氏同割股救之

牛斗光蒙城人年十七父疾割股父歿廬墓事母尤盡力一味之甘母未嘗不敢食歿後廬墓如父喪時

張依誠蒙城人戶部侍郎思恭七世孫父早卒家貧母好施依誠夏則汲水冬則刈薪竭力以承母志母病割股療之及卒自負土成墳廬墓三年

劉文試太和人因母病習醫時調湯藥母卒廬墓三年木生連理

陳倫太和人弟早卒遺孤六歲倫撫之成立分產與己子無異族黨有喪未舉者助之貧不給者濟之時服其義

張四重太和人嘗宿旅邸有女私奔重鍵戶不納有客寄以千金數年後來取封識宛然子名立領鄉薦庚戌中乙榜

黃經太和人家貧妻子嘗凍餒傭工以養母每具膳必誘幼子出外恐分母食及死無以爲殮遂鬻子以辦葬事

孫應傑太和人母歿甫斂有寇驚家人勸之逃傑曰柩在何忍去寇至疑柩中有金欲舉火焚之傑以身衛賊

怒揮刃戕其手足開視乃知非詐仍完其棺而去
常有榮太和人流賊壓境繼母戴氏病不能行榮與子
從教載母而逃遇寇將刃其母榮抱母求免欲殺榮從
教又抱父求代賊感其孝俱釋之

陳澤九太和人闖賊入境執其父有成將加以刃澤九
求代弗許同被害澤九妻王氏與其媳李氏以瓦器投
賊泣罵不已賊又刃之父子同難姑媳雙烈時稱節孝
兩全

周永祚亳州人母早亡祚侍父二十餘年同臥起昏暮
每負以行父歿廬於墓傍二載而卒

李心惟亳州人崇正八年寇入亳心惟泣守母喪不肯

離賊至被害子果見父死罵賊賊又殺之父子皆諸生
李如龍亳州人闖賊執其母如龍奮力擊賊賊怒並妻
劉氏俱剖腹死從兄猶龍守親柩不忍離亦遇害

王德新亳州人明季諸生割股愈父疾

張才廣亳州人吳裕武平衛人懷成亦武平衛人三人
皆嘗割股愈母疾

張維黃字坤儀潁州人鶴騰孫崇正乙亥流賊陷城與
其母匿巷舍賊牽其母索金將刃之維黃急呼曰母殺
我母請殺我賊殺之有老嫗伏積薪下見其引頸無怖
色惟顧母而已事聞贈應天府儒學教授

張大賡字颺甫潁州人鶴鳴子官廕生喜讀書工詩兼

長繪事寇破潁城父兄叔伯同日殉難家口死者三十餘人大賡救父罵賊受傷昏仆賊去復甦殯殮畢卽裹創走京師與兄大壯哭請於朝鶴鳴得賜祭葬而鶴騰大同咸蒙旌表

國朝沈允達潁上人康熙元年有盜入其室執父九德拷掠允達越垣告急鄰里不應奮曰有親如此安用生爲赴鬪遇害

解于信蒙城人割股救父廬墓三年

曹元聲蒙城人父爾嘉遇流寇不屈被害聲時在城卽縋城奔赴獲父尸而還

徐文明蒙城人李恭亦蒙城人黃麟生亦蒙城人又譚

籍太和人王廷瑄亦太和人五人俱親病割股

滁州

宋苟與齡字壽隆來安人志尚高潔事親力竭而禮盡母歿廬墓側日暮上食哭有芝十九莖生墓門宣和中州守唐恪以事聞詔旌其門

趙察字叔晦來安人紹聖初有聲太學察事親孝養孤姪如己子以行義爲鄉里所推人有爭得察一言卽解去晚歲以特恩調永福丞

王鈞滁州人性孝友貧不能自給而奉親必竭其力父卒哀毀盡禮事無巨細必資於兄而後行鄉里義之

明陳通全椒人正統七年輸粟千石賑饑事聞旌表

黃正字景齊滁州人性至孝母華氏年八十餘歿正哀毀不能起及葬負土築墳廬於墓側蔬食三年成化中旌表

徐昇字仲高來安人資性敦厚讀書守禮族屬百餘口同居共爨庭無間言

盧守益滁州人六世同居詔旌其門曰尚義

孫庸字又良滁州人父景和市馬廣西道死南寧官為藁葬景和歿三月庸始生及壯銳意訪父遺骸徒步之南寧徧歷山谷有二嫗指示葬所因而掘之遂得枯骨刺血以驗乃負歸營葬廬墓三年哀毀骨立時人稱孝邵煒字維張全椒人天性孝友父歿終身不飲酒竭力

奉事孀母待兄及從弟俱極孝愛

濮渠滁州人母卒侍父寢三年不入私室事繼母盡孝有異母弟五人渠皆篤愛之人亦不知為兩母出也

楊于庭字道行全椒人少聘陳氏女及笄而瞽或勸別娶于庭不聽人高其義後舉萬曆庚辰進士歷官兵部

郎中

金光璧字文宿全椒人太學生父九陞從湖南兵備致仕歸光璧侍行至中途夜遇盜光璧冒白刃負父突圍出獲免於難人稱其孝

吳國鼎字玉鉉全椒人給事中國龍長兄崇正癸未進士授中書舍人旋遭母喪廬墓不出

吳國瑞全椒人父疾篤剗肝以進而愈

金新鼎字仍之全椒庠生居母喪哀毀疾卒遺令以縞

素殮

國朝吳一龍字德中全椒庠生性純孝尤篤友愛撫姪如子

吳國器字玉質吳國縉字玉林俱國鼎弟國器割股以

愈父疾母歿茹素終身國縉順治壬辰進士授江寧教

授慷慨好施頻濟困阨人高其義

魯子琳全椒庠生侍奉父母竭力盡孝父母歿前後廬

墓六年 康熙四十九年 旌表

和州

南北朝宋劉瑜歷陽人七歲喪父事母至孝年五十二喪

母三年不進鹽酪號泣晝夜不絕聲勤身力以營葬事

服除二十餘年布衣蔬食言輒流涕恒居墓下未嘗暫

違元嘉初卒

唐何蕃和州人入太學以學行為諸生推服朱泚之變正

色叱諸生之欲從亂者由是六館之士不受汚蕃性純

孝以親老歸養諸生言於司業陽城請諭畱之會城出

刺道州不果畱韓愈為作傳

明黃有常含山人元末兵興奉母遠避屢經艱險竭力扶

護卒脫於難洪武初舉孝行授平陽主簿

王鎬字子京和州人永樂甲午舉人歷官戶部員外以

廉能著奔父喪哀毀踰禮負土築墳手植松柏有芝二

江南通志 卷一百三
本生墓側人皆言孝感所致元孫元吉由舉人歷教授
篤於孝友嘗侍父疾顛天嘗糞疾卽平復

張全和州人正統六年輸米麥千石賑荒奉詔旌獎
于纓和州人正統中父沒又三十年母亡纓哀毀廬墓
終制而歸先後如一有司欲舉旌典力辭而止

薛良和州人正統戊午舉人知獲嘉縣有孝行天順時
旌

唐慶字以章含山人少喪父家貧事節母盡孝奉養嫂
甚謹兄弟遺孤撫育如子二十餘年不私尺帛雖半畝
之宮悉以均授

張弘道字志夫含山人嘉靖己酉舉人母喪廬墓因母

存日畏雷弘道每聞雷聲中夜必起伏哭塚旁曰兒在
此當事薦其至行特擢南京國子監學錄

趙爲光和州庠生親歿廬墓三年

詹雨潤和州庠生年十一割股愈父病

閔應榜和州人刳肝愈母病

王弘中和州人割股療母

汪奇敏含山人割股療母後奇敏病其子迅亦如之

蔣崇仁含山人父母病割股以進者三皆卽愈

國朝周文光字武明和州人值歲大祲文光輸粟助賑全活

甚衆 順治十四年 旌表

曹超和州庠生順治十六年海寇入犯江寧掠及州境

超奉親出避猝遇寇兵欲戕其父母號泣請代寇憫而釋之家甚貧困而甘旨之奉必竭力辦具又辭聘不出侍養終身居喪毀瘠負土作墳家有父植紫薇一株已久枯超每對之哀慟忽復發花咸稱孝感 康熙四十二年 旌表

戴晏晏弟杲俱和州人兄弟事親皆篤孝父喪過哀絕而復蘇既葬並廬墓側三年服闋始歸 康熙四十四年 旌表

徐繼穉含山庠生連遭親喪哀毀盡禮結廬墓側前後六年嘗中夜聞母在廬外呼之穉驚起出視廬垣忽倒得免於阨又時有白燕飛鳴之異人皆言純孝所感

康熙五十三年 旌表

趙珮和州人年十一母病篤哀籲神前祈以身代伏地未起恍若聞神語許之母遂平復既長孝敬二親歷五十年後連遭大喪哀毀骨立墓在深山素多虎患珮廬於旁皆馴伏無犯人多嗟異 雍正六年 旌表
張弧和州人母病禱神乞以身代夢神允其請弧旋卒母果愈

晏璧生含山人貢生歷任繁昌蒙城潛山訓導事親撫弟以孝友稱又周給貧困全濟甚多

廣德州

唐潘晃廣德人事父至孝嘗以役事至京一夕夢神告曰

汝父病篤晃覺驚惶不已日夜奔走以歸一夕復夢神語曰汝父病愈歸問其故果如夢中言父卒廬墓芝草生墓側事聞詔旌其門授廣德令

宋王安兒桐汭鄉居民鄉舊有廟安兒父病篤禱於神割股肉和粥以進父即愈鄉人名其廟為割股廟

范日進宋咸淳時人家眾三百口不分產鑿雙井共汲惇睦無間

李貴居原通鄉事親至孝處宗族賙貧恤孤樂善好施故鄉人名其居傍之橋曰孝義

李彭年紹興間進士割股肉以療父病事聞詔表其都曰旌孝鄉

明姚觀壽割股療父病洪武中旌表其門

潘事心字若泰廣德人新婚而親沒柴毀骨立廬墓六年不入寢室

岑熙廣德人少以孝行聞客都下得遺金五百兩於旅次求其人還之御史馮明玠記其事庚辰辛巳連歲大稔破產以賑親族之無告者

姚啟宗字午明篤學好義見人冤抑不惜破產申雪之有誣陷大辟者其仇也啟宗力為解釋或負啟宗五十金欲鬻妻以償啟宗亟焚其券

王應篤家貧好義里人有貸金娶妻生子十歲矣不能償欲鬻子償之應篤焚券不復索歲饑出穀二百石以

賑鄉人

國朝程應桂建平人也爲邑掾乙酉兵亂知縣杜鶴年以家口委應桂應桂多方匿之獲全後鶴年被殺復護其孤孫與主婦還關中邑令張正中顏其居曰義高千古陳乾字亨之竭力事親弟歿撫姪如子族有賣子典身者出銀代贖貧人負債焚券不取地方染疫爲貧者延醫死則施棺人誦其義

宗維漢建平人宋畱守諡忠簡澤之裔孫也父患背疽維漢吮舐得愈母歿哀毀骨立旬餘不進水漿嘗廬墓悲號暈仆經日始甦母性好施捨維漢承順不倦出母所積金六百兩設廠賑粥更捐貲以瘞貧不能殮葬者

時建邑長圩水潰里黨艱於補築維漢復出母遺金募工修築十里完固倍昔贍卹老羸歲以爲常 雍正十一年 旌表

六安州

宋郭淵字濟川六安人羣盜起淵聚族保障一村六人往依焉大德末淮西大饑淵作饘粥食之時多鬻子淵視其尤困者假子養之長爲娶婦至歲大穰縱之去六人初習兵少文淵與父諗以詩書俎豆爲業人慕之多化者孫言與宋景濂游宋稱爲奇男子

明黃用賢六安人父母歿廬墓側清泉自湧有虎不爲害火不燬廬之異成化間旌表

江南通志 卷之三十三
張時厚六安人段弘仁與張翀皆英山人俱以廬墓旌
武紹元六安人父疾鍼灸必以身先居喪哀毀四載不
入寢室有司以孝聞獲旌

李九疇字敘卿六安人父鰲以疾廢祖老且貧疇事病
父衰祖曲盡孝養父先卒祖年九十餘卒喪葬如禮嘉
靖年旌其門曰順孫

馬應乾英山人割股廬墓縣令屢旌之而同邑段孟垣
亦以廬墓稱又有傳得年事繼母如所生鄉里稱之

何金六安人母遺腹生金母疾篤金爲嘗糞卒廬墓三
年萬曆間旌表

黃岳 吳繼宗 朱德溥 陳嗣禹 李世芳 謝叔

因 李植 程尚德俱六安人以割股稱孝

單植與周傑六安人俱廬墓三年

姜宣鄭顯忠俱英山人萬曆九年共捐穀四千石備賑
有司旌之

劉國翰六安人崇正十三年捐穀一千石賑饑都院史
可法旌之

汪禮六安人常商於淮南有浙人劉姓者將入京聞其
好義以五百金求寄逾三十年劉以罪戍遼左歸禮舉
以與之封識宛然

何克仁字樂山六安諸生嘗赴省試宿逆旅拾遺金故
畱不去頃主人倉皇呼索詢實還之不受其謝

江南通志 卷之三
項倫霍山庠生親歿廬墓年四十喪妻遂不娶鄉人稱
爲孝子義夫

段一定六安人明季族子女有流離失所者捐貲贖歸
居家孝友絕跡城市

國朝馬之光字實甫六安人明季舉人官修武令卒生平慷
慨好義公車偕友入都過西河浴見倚門一婦友愕然
與語大哭乃其子婦爲亂兵掠賣者之光罄所攜并告
貸贖還之邂逅一江西士人饑困欲死問其所須若干
慨然解橐濟之子晉錫以孝聞舉康熙癸卯南榜第一
黃九錫字公位六安人乙未武進士父鉉明季守備昌
平歿於王事九錫犯重圍尋骸骨歸葬季父鼎奉檄勦

山賊九錫參謀議平之居鄉修州學建橋梁

邱從先字寧野六安人少苦志問學父民達明季壬午
以守城罵賊死賊退從先於積屍中刺血得骸骨歸葬
奉母避難雖流離不缺甘旨撫兩弟俱成人舉鄉飲賓
駱士憤字子發六安人順治中領鄉薦教諭虞山擢郎
陽司李平反多隱德郡人尸祝之性至孝於郭西先塋
構祠三楹號呼上食如生前問視狀其孺慕誠信蓋得
於天性然也

金天爵字理源六安人少嗜學事親盡色養親歿逢忌
辰哀泣如初喪撫姪如己子初因艱嗣妻爲置妾詢知
宦裔具奩嫁之鄰被火幾百餘家天爵貸粟以贍悉賴

以安

程之光六安人性至孝 雍正九年 旌表

泗州

漢徐憲臨淮人居喪至孝白鳩巢於戶側太守鄭宏舉爲孝廉朝廷稱爲白鳩郎

南北朝宋王彭盱眙直瀆人元嘉初父喪家貧不能葬弟兄二人晝則傭力夜則號泣鄉里哀之爲助力作輓時天旱井泉枯涸彭號天自訴泉忽湧出葬畢而竭太守表其事名其里曰通靈蠲租布二世

宋朱壽昌天長人字康叔以父巽蔭補官歷知岳閬二州有善政巽守京兆時壽昌母劉氏有娠而出生壽昌數

歲乃還父家母子不相聞者五十年壽昌行四方求之不得熙寧初棄官入秦誓不見母不還乃相遇於同州尋時年七十餘有數子悉迎以歸事聞詔壽昌還官壽昌以養母故求通判河中府數歲母卒哀毀幾喪明孝聞天下

明陳達五河人幼喪父爲邑吏例得候選不忍違其母願乞冠帶終身母病割股及卒廬墓三年

蔡興盱眙人父歿負土築墳廬墓三年景泰間旌

楊芸泗州人母病割股得愈妻侯氏並以孝聞

湯三聘泗州人父病篤三聘寢食俱廢割股肉復以口吮便處父少安而三聘病歎曰父無恙予敢更求生哉

竟不起

楊見復泗州人母陸氏病篤見復剗左股進母少安弟見和復剗右膊遂全愈

周夢兆泗州人父病夢兆咬左膊以進病得愈善事繼母無間言

王之給泗州人年十四孀母病篤割股進之母遂愈
蔣學顏盱眙人年十六割股救母旌表

沈一元盱眙人母病劇醫藥弗效與弟一中俱禱天割股以進

張桂泗州人善事母割股療病

王大像天長人父葬廬墓三年時歸省母不入私室其

妻共母臥起母病痢大像嘗之

王枝天長人父卒母以年饑鬻枝於徽商枝念母時時哀泣商遣之歸而母已亡結廬墓傍悲號不輟有司聞而旌之

唐堯智天長人年十二母疾剗股作羹進之卽愈後以貢授教職陞湖廣上津縣知縣時按臣囑鄖道察鄖陽七邑奸宄道以舊怨株連百餘人堯智曰吾何忍以百命博一官焚其稿遂忤上官意調王府長史不就歸惟以勤學著書爲事孫士俊亦割股療母疾

許純忠天長人年十四割股愈母病
馬應台天長人年十二母病剗肝作羹其兄應星亦剗

股進母

石梯天長人年十四割股愈父病

繆悅道天長人田間兒也母病悅道剗肉熟之以啖母有教之者曰子悞矣須煮羹悅道再剗作羹以進母病遂愈

王應舉天長人櫛工也割股愈母病

王和天長人割股愈母病

許三選天長人割股療父病不使人知人有詢其事者曰此不能已之至情可以是聞於人耶

張嘉彥天長人剗肝愈母病

蘇旺仲弟智季弟旻與朱文玘俱泗州人正德間山東

盜犯境旺等糾合鄉勇朱文玘等挺身迎戰各手刃數賊尋以賊衆力窮遇害州守義而祀之

孫仁天長人家饒於貲值歲荒百姓負官租千餘金仁慨爲代償上官旌其義

戚杰字世秀泗州人年十七中嘉靖乙丑進士授知縣擢吏部考功郎中杰少聘花氏女未婚而瞽及登進士婦家請易婚杰不可曰夫婦倫也病廢命也吾不娶將安歸

蔣臚盱眙人萬曆間以孝行旌

張威天長人僉事張昊之僕昊征姚元洞蠻爲賊所執昊曰我死國宜爾汝急歸家威曰主不歸我何之賊刃

吳威力拒之曰寧殺我賊怒支解張氏世祀之

胡世富天長人崇應第之僕應第少時嘗出遇盜被執索金世富給之曰金在我橐執彼何為應第因得脫盜從世富求金不得被害

王秋天長人王應芬之僕應芬遊粵嶠得疾秋顛天割股進芬遂愈

國朝董官治天長諸生工詩文三割股愈父母病

潘其蓁蓁弟其茂天長人母病兄弟同日割股

李鸞瑞天長人母病嘗糞割股母隨愈後十年母又病鸞瑞再割右股療之

孫中裕盱眙人割股愈母疾

俞士瑄天長人歲貢生父母及生母歿皆勺水不入口哭不絕聲居喪三年不御酒肉冬不爐夏不扇後因修墓往返病暑而卒康熙四十三年 旌表

劉芳名泗州人兩割股以療母病

戚怡泗州人年十歲割股愈母病

潘士吉天長人輕財尚義揚州破人掠子女至邑士吉遇則買而歸之有二幼女無歸撫之如已女長而擇配年七十二預知死期言笑而卒

劉鼎盛顧佃張士鉅繆自守四人俱天長人皆割股救父

李行恭張弘業葉英陳養廉陳其弼王自明張儀胡時

達王禪八人俱天長人皆割股救母

達王禪八人俱天長人皆割股救母

